

Tele Aruba mester ta auto sostenibel

Minister de Meza a descarta influencia riba nombramento di director nobo di Tele Aruba

ORANJESTAD — **Bon Dia Aruba** a informa recientemente cu sr. Andre Schouten a keda nombra como director nobo di e planta nacional di television Tele Aruba.

Minister encarga cu Tele Comunicacion, sr. Mike de Meza a duna indicacion cu e decision di e nombramento aki no a bini for di dje. Sino cu un decision asina ta un caminda cu ta wordo cana pa Setar cu ta e compania encarga di Tele Aruba.

P'esey e mandatario a anuncia cu e lo sostiene un reunion cu e director di Setar y e Hunta di Comisario di Tele Aruba, ya cu e no ta representa e maneho directo di Tele Aruba, sino di Setar.

Proceso y seleccion

Minister de Meza a bisa cu e

director di Setar ta e persona autorisa pa busca y nombra un director na Tele Aruba. Di e forma aki minister ta descarta di su banda cu lo tabatin favoritismo of influencia politico den e nombramento di e director nobo di Tele Aruba. “E proceso, e negociacion, e combersacion di solicitud, e seleccion, mi no tabata den esaki”, el a bisa. Sino cu ta e director di Setar como esun encarga directamente di e maneho di Tele Aruba, esun cu a bin cu e decision aki. Minister de Meza no a duna detaye riba e criterio cu a wordo uza den e proceso di nombramento di e director nobo di Tele Aruba. E ta prefera di papia prome cu e director di Setar antes di duna mas detaye na prensa riba e asunto aki.

“Mi kier wak kico ta su

maneho pa cu Tele Aruba, kico ta e plannan pa Tele Aruba”, el a indica.

Tele Aruba auto sostenibel

Sr. de Meza no a basila di bisa cu un cos cu mester ta sigur ta cu Tele Aruba mester wordo maneha di tal forma cu e por ta sostenibel ariba su mes, y no cu Setar ta keda hinca placa den dje.

E mandatario a indica cu e placa di television mester produci bastante entrada pa por cumpli su gastonan, y produci programa di calidad. Sr. de Meza a admiti cu e no ta experto riba e tereno aki, pero si den su maneho general e ta haya cu Tele Aruba mester ta un compania auto sostenibel. Esaki kiermen cu e mester percura pa su entrada pa asina cubri su gastonan di operacion, y su servicio mester ta di calidad. □

